

Ju Phan Pa Pex

Tai Mai Krax Yesux Khrit

Lox Satang Pamhawm Cie Yesux Khrit
Taoh Lawd Kawn Pui Kukaux
Bhoek Luan Khaing GrauNghim Siawp Sibrawm Phimap Phicaox.
Laig Kadaux Ju Phan Pa khraox Cie Yesux Khrit

Tiem Pakpeung Mai Rieng Lih Khaing Munithi Pan Rak
son sang shao rawie hu daux Awn laing
(Pa sivat tix phat kadaux samat phon)
Rieng pa shao kadaux lai in mawh khaing Kanokbannasan (OMF
Publishers)

Lox mai Lai Sigang Khri pa shao daux phuk lai in mawh lox pa
sidawng tawng pui kah. Khaing baux Lai Sigang Khri pa hoik cox
sidawng yie tix doh rhawm kah, son sang seeb tix sitoe mai pui pa
phat tom nie khankix kieh pre haok hwan sinyek heue.


Phuk lai in khre tix yuh lih son sang seeb sitoe tix tawx giex (ang
Cox cai) mai chix tix teei phre hu ka paox grawm tix khankix
kudauh kudee heue.
(phan ang bao jiam tix yuh lih ka pak peung kuceu khankix son
sang rawie hu)

Phan maix simie tix sitoe mai simie tix baox tawng tom nie sitoe
ka nambad phon ka greem in

Phong 081 2894499

Prasit.emmaus@gmail.com

SaTang Pa Mhawm Cie Yesux Khrit



Siyiex Phan Haktiex

Haktiex Mai Raoma Li Koe khaing Pa hoik Phan Siyiex ([YamJauh 1:1](#))

Mawh kheu krax yumrhawm ex chix tawng, grawng pa hoik lih mawh hamtiex, kheu gumlox pa teei tix yuh khaing ceu pa pon tix yaox heue. ([Lai Hebrie 11:3](#))

Kuceu Ka Piang Haktiex Hoik Kied Mhawm


Siyiex yaox ka can pa Phan Tix kuceu mai ceu ankix mawh pa kied mhawm ([YamJauh 1:31](#))

Viang mawh nan Kawn Pwi Ang Nghiet Lox Siyiex Mai Yuh Phimap

Mai Simiang Siyiex tawx Akhwang ka kawn pwi simex pa hoik phan Nawh Cao kieh laug tix krai lox pa mawh pa meh ah nin: "Maix pon tix ih kuceu khaing khaox ku khaox daux sipeem in . viang mawh nan, maix tag ang pon tix ih khaing khaox pa tawng pa mhawm mai pa ang mhawm, mawh kheu singaix hoik ih maix khaing khaox an, maix tag yum tete heue." ([YamJauh 2:16,17](#))

Viang mawh nan kawn pui pa hoik phan Siyiex an, simie tix koe sibrawm awm pa koe Siyiex awm pa hoik pie lhen siuing pa koe jhawm yuh Satan ka kiex ra kaux in, kiex tom ih ka plix khaox an, khaix an lih krax lhat graung ka ang kiex cu nghiet lox Siyiex kiex tom mox tokaux tix khaing Nawh Cao. ([YamJauh 3:1-8](#))

Siyiex tom chawk ah nin: "Hoik ih pax plix khaox pa ang Aux kieh pax ih lieh? Kawn pui deeh ah nin:" Bun pa tawx Maix Cao ot mai aux, nawh tawx plix khaox an ka aux, mai aux hoik ih heue." Viang mawh nan Bun deeh dulox ah nin: "Siuing (pa mawh Satan) an hoik pie ka aux, mai aux hoik ih heue. ([YamJauh 3:11,12](#))




Kawn pui tag Sipub krax sivix siwan tom nie jao phimap

Kawn pui yum kadaux plak khwan ngao

Glangka in, kheu ang koe lox lai beenli, aux im ju heue. Viang mawh kawx nan yam lih hoek lox tawm, phimap deeh im, mai aux yum heue. ([Romax 7:9](#)) Mai Nawh Cao hoik yuh tix kieh pex im kah, yam hoik yum pex kheu pa phit pa lud mai phimap phigrham. ([Efesux 2:1](#))

Kawn pui caw yeh tix khaing Siyiex

Mawh kheu hoik tieh feen kawn pwi been krax ot krax koe pa hoik deuh Siyiex, krax pa yuh kawn pwi paox pie tau mai Siyiex hoik yeh krax lih awm koe ku raux sinax kix, ([Lukax 16:26](#)) Kheu krax pa yuh kawn pwi phimap hoik kieh kix via mox tix khaing Siyiex, singai khaing Nawh Cao, krax pa yuh kix paox pie hoik laux heue. ([Isayax 59:2](#))




Kawn pui ang pon bleeh ka Siyiex ka blawng pa tang yuh tix tiru

Kawn pui yuh lung tix yuh tom sang pon bleeh tix ka meung raoma, koe krax pa coca tix yuh pa mhawm kawx som nai. Meung tix yuh ka plak beenli kawx ang lih mu koe ceu, kheu jao kawn koe ju phan pa yuh phimap, yaung pa sang cheu kix tix coca tawm sipauk son sang tiang ka guh ku pa keu sinax kix mai Siyiex, viang mawh kawx nan yaox kadaux krax pa laux leeing ku krax ku blawng, kheu jao meung raoma mawh dauhdee praix pa loig, pui caox caig phimap phighram ang pon tix laig, hoik tang mawh (thamachat) dee raux daux rhawm rhi kawn pui siawp sibrawm pa caox pa hoik jhawp Kwang kah, ceu pa mhawm sang chix lih koe kadaux siawp sibrawm pacaox daux kawn pui yuh ka mawx?

Mai yix khawm uik awm ceu pa ang singax, mai krax pa rauh pa see yix khawm uik awm kraung pa seeing heue. Yix khawm uik vhit hu awm lhax khaox; mai phimap phighram yix hoik thah yix hu awm bhaung heue. ([Isayax 64:6](#))

Plak beenli ang pon teem kawn pui yuh krax mhawm, viang mawh nan tang plak deeh jhi sakse ah kawn pui khex pon hawt blak beenli lieh, hoik yaox kah sidawng kawn pui hoik som nai daux krax pa tuah klaung tix, (payuh tix) hawk beenli pa hoik tat tix deuh mawh pa deeh blak tix chix yaox ka siawp sibrawm phimap pa hoik jhawp Kwang ka daux ju phan pa im ex kaux mawx kaux an heue. ([Romax 3:20](#); [Efesux 2:8-10](#))



Rhawmkeud kawn pui mawh pa khreeing brai

"Rhawm kawn pwi lang teung lhak caox khaing kuceu khawm: uik, mai nawh ang koe: krax pa pon chix cox pai, mawh pui mawx pa pon tawng kah? ([Yeramix 17:9](#))

Awm pa hoik tiem tix deuh ah nin,


"Ang koe pui pa rauh pa see, pon ang koe tix kaux kawx heue. ([Romax 3:10](#))

...Khex mawh pot daux rhawmrhi in dee kaoh krax keud pa caox pa caig. Pa mawh ceu pa phit mai moeng pui, mai ceu pa phit pa vao mai bundai, mai ceu pa pauh pui yum, ceu pa briex pa lak, mai: ceu pa gaweng ka cie pui, ceu pa yuh pa caox khankix, ceu pa pie pa lhen, ceu pa simie tix yuh ceu pa ang khaw ang jiet, ceu pa bohrhawm pa khoi: ceu pasa palao ka Siyex, ceu pa ting rhawm ting rhi, mai pa yuh ceu pa daox pa aw khankix heue. Ceu pa ang mhawm ang mhiem ceu in khawm uik, mawh ceu pa lih khaing plak daux, mai kieh pui seeing brai heue." ([Makux 7:21-23](#))

Ex khawm uik kawx hoik rom tau mai: kix tix bawg, kadaux pa hawt alo nex nham tokaux tix, mai hawt yuh pa simie nex nham, mai pa lak keud tix yuh, mai ex hoik mawh nang: kawn praix pa songrhawm, awm: hoik mawh pa deuk khankix heue. ([Efesux 2:3](#))

Khaing rieng ka piang, rhawmrhi kawn pui hoik naog ka phimap, awm pa simie tix pon, briex lak, pa phitvao (sox). krax pa pie lhen, lox angmawh angmeh, salao sibriem, ah lox caox caig, jhax lawg (si-uing), koeng, bakviang, yuh laux (sivai), krax nieh caox(reeh), krax ghawx (lig), krax canyhau ang nghiet pui tang kaux (pex), krax yaw tix, map nai ka pui tang kaux (simkaung), mu sim-uing pa vhaikvux hoik mawh sokrhawm pa tawng praix cie ex pa hoik dug, hoik mawh Satan pa yuh sokrhawm cie ex vhaikvux heue. (2Kawrinthux4:4)

Kheu nan ex tom ang chix yaox Khwan Singax cie Siyex (sim sikaux), mai ang lai nghiet gumlox Nawh Cao (Lai Sigang Khri) pa Pon Chix kheet tix tik phimap pa koe daux rhawmrhi ex kawn pui lih uik.




Kawn pui ang pon cox rhawmrhi pacaox pacraig tokaux tix tiru

Cao Yesux Neraw ka cub cao giex kaing been li khankix daux bawg yam an dix ah nin: mawh krax pa kaig tua kah tete, pex pa mawh cub cao tiem lai mai cao giex kaing beenli khankix, pex yuh tix awm pui mhawm, viang mawh nan pex awm daux simeeig sipaung pui yum, pa hoik kraix simaox ceed, panyawm tix jhak plak praix, viang mawh kawx nan plak daux hoik naog si-ang: pui yum, mai: pa seeing pa brai: pa cuix pa si um heue. Kix yuh tokaux tix kieh pui tang kaux yaox awm mawh kix pui pa hawt Alo Siyiex heue. viang mawh nan plak daux hoik naog ka ngai kawm rhawm vawk, mai: pa caox pa caig pa pie pa lhen heue. ([Mathiex23:27,28](#))

Khaing rieng plak piang in, rawm pa pon hoek khaing cag jhok rawm, cag in jhok rawm cu si-um, mawh kheu mawh rawm plak greem mawh rawm pa cu si-um, kheu nan viang cheu tix kraix si paing ka cag jhong rawm kieh jhok tom uik

nyao khawm uik kawx, phan ang mawh nan cung tix sidiex gau ka cag jhok rawm nghiet, shao khaox grix simeed sat sivied ah ka nah kawx, shao daux krax daux blawng pa yuh ka mawx kawx nah ang doh chix tieh chix cox tix ti bawg kawx, mawh kheu krax sivix nawh koe ka rawm pa ot plak greem tiex dee raux, ang mawh ka plak praix ka cag jhok rawm. Mawh kheu nan, karx pa cox dee sivix caw tix loh cox tom dee raux deelih rawm keut. Awm an krax pa cox x phimap krax pa caox kawn pui tag caw deeh cox ka dee raux ka daux ju khwan rhawm rhi kawn pui, mawh pui mawx pa sang chix pon thai loh ka ju khwan rhawmrhi kawn pui lieh?




Kawn pui hoik lih mawh siliex cawng phicaox

Ka tom yam jauh kawn pui ang cu nghiet ka lox Siyiex, mai cu nghiet ka phicaox, ex tom ot ka greem sibrawm phicaox pa jhawp kuang krax keud krax sawn mai rhawmrhi ex heue. Ex tom im ju kadaux krax pa caox haktiex in, pa khaw mai: riang rao siawpsibrawm bhawm, pa mawh khwan pa yuh kaing kadaux kawn pa lheu pa lieh lox khankix. ([Efesux 2:2](#))

Hoek tom in si ngaix, pa ngauh ex kah ang lai mawh ka kawn pui, viang mawh Nan ngauh nawh mai cub pa jhawp kaing, cub pa koe siawp sibrawm khankix, ngauh nawh ka cub simiang pa giex kaing haktiex pa vhaik in khankix, ngauh ka cub khwan caox phicaox phicaig pa ot plak haktiex khwan khankix heue. ([Efesux 6:12](#))

Viang haktiex in ot daux tawm taix phicaox kawx, ka dee raux daux rhawmrhi ex hoik tawng ka koe siawp sibrawm pa ting ka piang pacaox heue. ([1 Yohan 5:19](#)) Viang mawh kawx nan, to kaux ex ti ru ang pon kieh tix Iwat luan khaing siawp sibrawm phicaox heue... Mai pui mawx ang ah pa kawn ca yuh phimap hoik mawh cub tau mai phicaox... mawh kheu grawng in Kawn Siyiex hoik lih bleeh kadaux haktiex in son sang yieh laux ka kaing pa yuh phicaox heue. ([1 Yohan 3:8](#))

Krax ot koe ka greem tan kah mawh krax ot koe pa naog krax sivi sivan krax tug krax kha mai krax yum.



Kawn pui tag yum mai khaix an tag caw krax prawngca

Kawn pui ot ka greem siawp sibrawm phimap phighram pa caox, kheu nan kix im ju ot koe ka daux phimap, yam hoik yum kix, kix tag caw sipub ka krax prawngca heue. ([Hebrie 9:27](#))

Kawn pui kukaux tag sang rieb ka krax prawng ca awm krax pa im ju ot koe kix hawk kaux mawx kaux an.

Khaing rieng plak piang, simex tix kaux camaox ka sivai (plix bwan khwan nawh) hawt leue ka tix, viang nawh yuh lung tix to luan phuh jao mai giex nhu saux pa tang teue ka guh klawn tiex kawx ang pon luan, kheu kawn koe goe rawm pa kuan ka plak greem (krax yum mai krax prawngca). Kiang ra mu (mawh mhai phektem ka ngaix sawm bawg yam nari) pa kle ka nhu saux ka khaox plak piang (nyaing bawg yam nari ju khwan) pa kawn deuk, mai tix ngaix sax nhu maox saux tag sang dud (nawh tag cod ka plak greem, nawh tag yum kheu jao goe rawm) ang koe mawx tix pa pa luan khaing krax prawngca heue.

Bawg yam pa hoik luan dix Siyiex ang lai ci tix deuh kah, mawh kheu ang kawn pui nyang doh rhawm kah, viang mawh nan Siyiex hoik tawx Yesux lih hoek ka piang haktiex in, son sang krai pao kieh kawn pui doh rhawm ka pamawh pameh tom khaw caw, kheu nan "Kieh pui kukaux tieh loh rhawmrhi tix mawh pa khraox, mawh kheu khaix hoik yum, kawn pui kukaux tag sang laig ka krax pa prawngca parauh pasee khaing Kaw pa Siyiex hoik laug hoik ciak mawh Cao pa prawngca ka kawn pui haktiex heue." ([Kawncau 17:30,31](#))

Kheu mawh Yesux Khrit, Nawh Cao pa koe siawp sibrawm Tix prawngca ka kawn pui, kheu jao ang siawp sibrawm phimap pa caoxcaig doh pon jhawp Kwang kieh Nawh Cao ot kadaux krax yum, Siyiex hoik deeh kieh Yesux Khrit kaoh im khaing krax yum heue.




Yesux Khrit mawh lox pa Siyiex pawk hoek ka krax pa sivixkawn pui

"Mawh kheu Siyiex kied muh tix dex dawd tau mai kawn pui haktiex pa hoik phan Nawh Cao, tom sidauh tawx Nawh Cao Kawn tixkaux Tix khaing, son pui pa eenrhawm tix ka Nawh Cao kukaux tag ang laux leeing, mai tag pon ju pa khraox pa ot tau mai Siyiex lhauh leeing ju heue." ([Yohan 3:16](#))

"Siyiex tawx Kawn Ai Tix laig hoek kadaux haktiex in, son sang taoh lawd kawnpuihaktiex, kieh lwat luan khaing krax laux leeing mai siawp sibrawm pa jhawm Kwang phimap pa caoxcaig."

"Siyiex koe krax pa caoxhrhawm jhawm yiem mai rieb ka pui kukaux kieh mawh pui cie Nawh Cao pa ang lai sawn ka ngawh jum, kheu ceu pa hoik yuh Yesux khrit, Siyiex hoik ploi ka kix kieh mawh pa ploi khaing mawh kix siliex cawng phimap." ([Romax 3:24](#))



Yesux Khrit koe sibrawm ka pa pai pui saux ngia


Khwan cie Siyex ot kadaux Yesux Khrit, Nawh Cao tom koe sibrawm ka piang praix klawng daux haktiex in.

Siyex groi Yesux Khrit ka Khwan Singax Singeh, mai siawp sibrawm, mai Cao Yesux yuh ceu pa mhawm pa mhiem tauh hu kudauh, mai cox pai pui ku kaux pa ot greem siawp cie phicaox kieh jhawm saux moi, pa pon yuh Nawh Cao yuh nin, kawx mawh jao ot Siyex tau mai Yesux Khrit. ([Kawncau 10:38](#))

Yam lih hoek Yesux Khrit ka Daux haktiex

"Yesux hu lailing kadaux yaong: daux veng khawm uik, mai: gau ka daux nyiex dee sidiex ceu pui Yudax, mai: krai pao lox satang pa mhawm pa dex pa dawd mai: Meung Siyex, mai cox pai pui pa koe: jhawm saux jhawm ngia kuceu moi: heue." ([Mathiex 9:35](#))

Ceu pa yuh Yesux Khrit daux bawg ya an, mawh pa cox pai pui dug ngai pon tix deeh yaox, pui laux caong deeh pon hu, pui koe jhawm saux sipawg kieh moi, pui lheet yhaok deeh chix mhong, mai pui pa hoik yum kawx kieh deeh chix kaoh im mai ka pui hot pui sha kawx koe akhwan tix pon mhong pon nghiet lox satang pa mhawm. Pa taoh lawd kawn pui lwat luan khaing siawp sibrawm pacaox in heue. ([Mathiex 11:4,5](#))




Yesux Khrit koe sibrawm ka piang phi mai grheu kah khwan caox

"Ponbo tix ngaix, yam klip singaix khaing gawng, kix viex pui passaux pangia mai pui pa laig phicaox hoek ka Nawn Cao. Pui veng khawm uik khrawm pao tix sivoe siviex (nyiex) tan. Nawn Cao cox pai jhawm saux kuceu ka pui khankix tom nie, mai grheu phi caox lih hu kaing pui tom nie, mai Nawn Cao ang cu cub phicaox inkix nye, kheu hoik tawng kix mawh Nawn Cao mawx." ([Makux 1:32-34](#))

"Bawg Yam mawx ang ah yamphi: pa seeing pa brai: khankix yaox Nawn Cao: kix goh gup sivoe Nawn mai: kok yo ah nin, 'Maix mawh Kawn: Siyiex heue'." ([Makux 3:11](#))

Lheu khaing an; ... Nawn Cao tawx kawncau mausoi koe siawp sibrawm yaung Nawn Cao kadaux pa lih hu kix rieb tix yuh kaing cau son pui meung mai pa krai pao grawng meung haktiex cie Siyiex daux Ceukaux Nawn Cao heue.

Kawncau mausoi khawm Atigliah ra kaux deeh hoek mai gauxrhawm gauxrhi Krai kaing yuh kix Ka Yesux ah nin: "Sara eue, yam kok yix ka Ceukaux Maix Sara, cub phicaox khankix kawx, nghiet lox yix heue." Yesux deeh pawk lox ka kix ah nin: "Aux hoik yaox Satan rau khaing raoma awm Puplak praix heue." ([Lukax 10:17-18](#))



Lox Sidiex gau pa ting ceu tiblah pa Yesux Sawn gau ka pui meung

Yesux krai ka pui pa nghiet ah nin: "Aux mawh pa riang haktiex heue, pui pa hawt khaix Aux tag ang hu kadaux pa vhaik, viang mawh nan nawh tag sang pon pa riang pa im ju heue." ([Yohan 8:12](#))

"...Aux hoek sonsang pon kix pa im ju tete, pa mawh pa im ju pa grum naog mhawm heue." ([Yohan 10:10](#))


Yesux baox ah nin : "Can pui pa mhong jhawm taug mao tix mai pa klawm beeh glawm cien khankix hoek sawg ka Aux heue. Mai Aux tag kieh pex vai tag vai mao, kieh Aux mawh Cao thung ju phan cie pex mai gau sawn tix khaing Aux, kheu Aux tiiem rhawm mai mhawm jhawm mai pex tag sang vai tag mao rhawmrhi kauxhak heue." ([Mathiex 11:28-30](#))

Maix caw yuh ka pui tang kaux awm pa simie maix pui tang kaux yuh ka tix heue. ([Lukax 10:31](#))

"Phan maix pluat ploi phimap pui pa yuh phimap ka maix, Keeing maix pa ot piang meung raoma kawx tag sang pluat ploi ka phimap maix nang heue. Mai phan maix ang pluat ploi ka phimap pui tang kaux, Keeing Cao maix kawx tag ang pluat ploi ka phimap maix nang heue." ([Mathiex 6:14-15](#)) phan ex ca kawn jhawp ka phimap, phimap ot ka mawx?

"Paw pawk bix tix ... Paw kieh krax coax pex ka maix, viang mawh nan teei krax mhawm pex krax caox." ([Romax 12:19, 21](#))

Can Pa gau sawn Yesux khawm uik khawm leeing, Nawh Cao ghoik ngie ka pa ting ting ra ceu khaing. Pa "Muh Siyiex khawm rhawmrhi tix khawm uik, khawm ju tix, mai ka dee chix keud chix sawn tix khawm uik, mai muh ka paox plawg paox jhawm tix awm muh ka tokaux tix." ([Mathiex 22:37-39](#))



Ceu pa yuh Yesux Khrit ka piang haktiex in

Nawh Cao yuh son pui tang kaux mai pluat ploi kieh pui bhoek luan khaing phimap
Yesux Khrit ang hoek daux haktiex in son sang kieh pui yuh son Tix, viang mawh nan hoek son sang yuh son pui tang kaux, mai tawx ju Tokaux Tix sonsang pluat ploi pui tom nie mawh pa ploi sivat khaing siawp sibrawm phimap heue. ([Makux 10:45](#))


Nawh Cao rieb tix klawm phimap kawn pui

Yesux Khrit rieb tix klawm phimap ex ka piang khaox lhak kadaux tokaux tix, sonsang yut ju phan phimap pa caox cie ex mai koe ju phan pa khraox pa Siyiex lo kah heue. Rhoi mat phimap ju phan cub ex hoik pon rieb krax pa pai moi kheu jao khaix rhoi mat mai krax saux tuat pa rieb Cao Khrit piang khaox lhak tang ex ... ([1 Petrux 2:24](#))

"...Cao Khrit Kaw pa ang koe phimap yawm tix mawh pui phimap son ex, ju phan pa tieh loh cie ex, mawh pa hoik jhi sidawng ka krax raux krax see pa kaux sija Siyiex. ([2 Kawrinthux 5:21](#))

Nawh Cao koe krax pa pex ka piang siawp pacaox

Kaing pa cox pai jhawm saux, pa grheu phi, pa grheu khwan caox mai pa deeh kaoh im khaing krax yum cie Cao Khrit, mawh pa jhi sidawng krax pex cie Siyiex ka piang sibrawm phimap caox, kheu nan phan mawx laug tix im ju greem veei bwanson cie Cao Khrit, ju phan kix kawx tag ang caw tix lai ot greem pa jhawp kwang sibrawm pa caox kah hkaix in heue. ([Kawlawsie 2:15](#))




Yesux Khrit koe pa pex ka piang krax yum ka pa deeh saox kaoh im

Yam kawncau hu dee sipaung Yesux, kawn cau raoma ah nin ka kix, Yesux ang lai ot tin, Nawh Cao hoik kaoh im khaing krax yum heue, hawt awm pa grux krai Nawh Cao ka pex phaovoe ka meung Galilie ah nin, Nawh Cao tag caw ap ka daux taix pui phimap, mai caw tawk ka piang khaox lhak mai Nawh Cao tag deeh saox kaoh im daux loe singaix heue. ([Lukax 24:6,7](#))

Ceu pa deeh kaoh khaing krax yum, ang lai mawh pa raux pa mox, ka piang hoik pau lien Romax ka simeeig Yesux kawx kham sakse ah Yesux kaoh im khaing krax yum, mai kheu in mawh pa pex cie Cao Khrit ka piang krax yum, krax yum ang doh pon jhawp Kwang een ka Nawh Cao. Mai koe pui tom nie mai khawm Pawlux kawx mawh mhai sakse kah, pa pon sipub tix yaox Yesux hawt awm pa hoik mhai tix deuh daux Lai Sigang Khri. ([Kawncau 2:24,32; 1 Kawrinthux 15:3-8](#))

Kaw pa tiem Lai Plak jhi kieh yaox krai lao ah Cao Khrit nin: "Aux mawh pa jauh mai pa sidauh, Aux mawh kaw pa im ju, Aux hoik sax yum, viang mawh nan jhakheue, Aux ca im ju leeing ju heue. Aux giex jiak saw pa tawx Aux koe sibrawm tix paoh phan ang mawh nan nyEEP dee ot pui yum. Mai chix pon thung kix hoek im ju baox tix bawg heue." ([Plak Jhi 1:17,18](#))



Yesux ting sibrawm ka piang pa caox khawm uik


Mawh kheu Yesux Khrit kaoh im khaing krax yum, Nawh Cao haok piang Meung raoma ngawm plak taix khawn dawm Siyiex, Siyiex kieh cub kawn cau raoma cub pa koe siawp sibrawm mai khawm cub pa koe sibrawm ot greem siawp sibrawm cie Yesux Khrit. [\(1 Petrux 3:22\)](#)

Siawp sibrawm cie Yesux Khrit hoik ap tix tawx ka kawn cau pui pa yumrhawm ka Nawh Cao, kieh kix koe siawp sibrawm ka piang khwan caox, awm yam tag khre Pawlux tix hu rom rawg bwan tau mai cub caw, koe bun tix kaux pa koe phi pa yuh phi caox phi caig ah Pawlux mawh mawx... tom ang Pawlux lai pon gun tom veeh tix ah nin ka phi an, "Aux nhie maix daux ceukaux Yesux Khrit lih hu khaing daux tokaux bun an dom in." khaix an khwan caox an lih khaing tokaux nawh dom mawx dom an. [\(Kawncau 16:18\)](#)

Yesux Khrit simie ex koe ju phan pa khraox

Nawh Cao ang joeng simie ngie ex ci priex lox sidie lox gau, phan ang mawh nan gau tix chix deuh tix tawng ngie grawng lox lao krax pa im ju Nawh Cao khaing, viang mawh nan ceu pa lo Nawh Cao mawh pa lo tix kieh ex kukaux koe ju phan pa khraox awm pa lo Nawh Cao heue.

Viang mawh nan khaing ju phan cie ex caw siawp sibrawm cie krax phimap pacaox tix jhawp Kwang kah, ex ang lai koe rieang rao pa pon chix tieh loh ju phan ex tiru, kheu nan Yesux Khrit tom tawx Khwan Singax Singeh cie Nawh Cao laig kadaux ju phan ex kaux mawx kaux an, son sang chix pon tieh loh tix mai priex jhung ju phan pa khraox cie ex, kieh lih mawh awm pa diex gau mai pakpeung cie Yesux Khrit heue.



Yesux mawh daux krax hu bleeh ka Siyiex daux meung raoma


Yesux krai ah nin: "Aux mawh daux krax, mai pa mawh pa meh, mai ju heue. Phan ang mawh daux Aux pui tix kaux kawx ang pon tix hoek ka keeing Cao." ([Yohan 14:6](#))

Petrux deeh ah nin ka kix, "Doh keud doh sawn: ka phimap pex, mai: baptis pex kukaux kadaux ceukaux Yesux Khrit, sonsang pon luan khaing daux phimap phigrham pex, mai: pex tag sang pon khawngphak Khwan Singax Singeh heue. Mawh kheu lox mukheu pa hoik tawx an, mawh son pex, mai son kawnpraix pex, mai pui pa ot dee singai khawm uik. Awm kok hoek Simiang Siyiex ex ka Nawh miex ding ang ah, mawh ding heue." ([Kawncau 2:38-39](#))

"Kaw pa yumrhawm ka Kawn Cao (Yesux Khrit) koe ju leeing ju leeing phan, mai kaw pa ang yumrhawm ka Kawn Cao ang lai pon tix yaox ju, viang mawh kawx nan pa songrhawm Siyiex koe piang nawh heue." ([Yohan 3:36](#))

Ap ju phan maix kieh Siyiex tieh lox mawh pa khraox

"Mawh kheu nan, puxaik khankix eue, aux tom khyox khaw ka pex, kheu pa caoxhrhawm caoxhrhi Siyiex, yuh kah mawx sonsang tawx pex tokaux tix, tix mawh pa tan pa lu pa im: pa singax singeh, pa khaw pa caw ka rhawm Siyiex, pa mawh kaing krub pa keung pex tix yuh heue. Mai: paw kieh khaw mai rieang baux ju in, viang mawh kawx nan kieh pex deeh tieh loh, kheu baox yuh rhawmrhi tix pa khraox, yuh kah mawx sonsang chix cheu pex tix tawng, mawh pa yuh kah mawx pa mawh pa mhawm, mai: pa khaw pa caw rhawm, mai: pa grum mawh alo Siyiex heue." ([Romax 12:1-2](#))



Siyiex pluat ploi krax phit lud ex mai cox daux rhawmrhi mai tieh loh ex mawh pui pa khraox

"Pa ex hoek krax taoh an, hoik mawh kheu bwanson krax caoxhrhawm jhawm yiem Siyiex, pha khaing krax yumrhawm cie ex, ang lai mawh pa lak keut khaing tokaux ex tiru, mai hoik mawh pa nawm Siyiex.tix tawx ka ex heue " ([Efesux 2:8](#))

"Kheu nan phan pui mawx ot kadaux Cao: Khrit, nagh hoik caw mawh pui pa khraox phan tix. Ceu pa prim khankix hoik grai grup hu, jhak heue, hoik lih mawh ceu pa khraox uik heue. ([2 Kawrinthux 5:17](#))

"Mai pui kukaux pa cu tix rieb Nawh Cao, kheu pui an hoik mawh pa yumrhawm daux Ceukaux Nawh Cao, Nawh Cao kawx simie Tix tawx kix siawp sibrawm mawh kawn Siyiex, daux pa mawh kix an, ang lai mawh pa keh khaing nexnham, phan ang mawh nan krax keud, phan ang mawh nan dong sown kawn pui, viang mawh nan keh khaing Siyiex heue. ([Yohan 1:12-13](#))

Ka pa pon mawh ex pui khaox, ang ting ceu ka mawh ex mawx, viang mawh nan pa ting ceu khaing kuceu mawh ... pa Nawh Cao ot daux ju phan ex kukaux, kheu nan kieh ex kukaux koe ju phan pa rieb kaing pa khraox phan tix, kieh koe ju phan pa toe tix yaung Cao Khrit heue.



Yesux hoik khre dauh dee ka son ex

Daux nyiex cie Keeing Cao ex koe dee ot tom nie, "Phan ang koe Aux ang tau tix krai ka pex ah, Aux jiet tag sang hu khre dee ot son pex, yam Aux hoik cox khre tag sang deeh hoek rieb pex hu ot tau mai Aux." ([Yohan 14:2-3](#))

Pui ankix pa cu tix rieb mai muh Nawh Cao tag sang ot mai Nawh Cao leeing ju leeing phan

"...Yam pui pon mhong Iwah sinum loxtawx kawncau raoma pa ting mai lox phlu teettawng cie Siyiex yaog tix Iwah, Kaw pa Nawh Cao mawh Siyiex tag sang lih hoek khaing raoma, mai pui pa hoik yum kadaux Cao Khrit tag sang deeh kaoh phaoka heue.

Khaix an cub ex pa kawn im ju pa ot daux haktiex in, tag sang caw teei haok tau mai kix, kadaux paiawm, sonsang sipub ka Kaw pa Nawh Cao Mawh Siyiex kapiang raoma long, mai ex tag sang ot tau mai Nawh Cao leeing ju leeing phan heue." ([1 Thesalonix 4:16,17](#))

Khaing rieng plak piang in, pui pa hoek rieb ka Yesux tag pon rieb ka krax pa pluat ploi khaing pa ang Nawh Cao ciyang kieh hu ot mai Nawh Cao... krax yum, pa rieagyo, pa yiem, pa saux tag ang baox lai koe khaix, mawh kheu baux ju pa prim hoik luan hu, khaix an, son pui pa ang rieb ka Nawh Cao tag cod lih hu daux glauh ngu jao krax phimap pa yuh kix heue. ([Plak Jhi 20:11-15; 21:4](#))

Yesux krai ka pui pa ymrhawm ah nin: "Aux cung tix gleuh siviex (rhawm) phan pui mawx mhong ka lox Aux mai paoh siviex (rhawm), Aux tag laig sawg nawh..." ([Plak Jhi 3:20](#))

Pui phat pa nabyam yungyi pa muh khankix eue

Phan maix koe rhawmrhi pa simie tix rieb ka Yesux laig ot kadaux ju phan tix, maix chix pon paoh ju phan rhawmrhi cie maix rieb ka Nawh Cao dom in, khaix an kieh maix rawg bwan pa mawh krax pa sikah tau mai Siyiex mawh son lawng kaux tix, awt awm lox rawg bwan plak greem in:

Krax rawg bwan ang mawh pa pih piang, viang mawh nan lox pa rawg bwan maix, hoik mawh pa kaoh khaing jied lih daux rhawm maix tete telai, mai lox sikah pa yie pa khaw caw tix krai, pa caw tix krai sikah mai Siyiex, mhaing Siyiex laig ot daux ju phan maix heue.

Yam hoik laig ot Yesux ka daux ju phan maix, Nawh Cao tag sigrhah ka phimap krax phit lud khankix pa sax yuh maix, Nawh Cao tag tieh loh kieh maix mawh pui khraox, khaix an maix tag pon mawh mawh kawn praix cie Siyiex heue, mawhju phan pa khraox pa ot mai Siyiex jheeng jheeng, pa Khrityan kok mawh "Ju leeng ju leeng phan" Siyiex tag sang dok thung krax ot koe singaix sawm ju phan cie maix heue.

Daux pa rawg bwan ang joeng mawh pa hawt awm ka plak greem in ngie, viang mawh nan maix pon chix rawg bwan kumphaw chawkcheng ku ceu mai pon chix rawg bwan ku bawg yam nari ku dauh dee heue.

Viang mawh nan ka plak greem in mawh mu pakpeung daux pa rawg bwan pa maix pon chix shao daux pa jauh tix sikah krai ka Siyiex bawg liangyuh nin:

Siyiex pa singax, singax mai pablon kied singax, kawn praix paoh rhawm tix rieb Yesux Khrityan kieh laig mawh Cao mai mawh Siyiex pa teem kawn praix tix kieh luat luan khaing sibrawm phimap caox caig khawm-uik, rawg Siyiex pluat ploi mai sigrhah phimap caoxcaig pa kawn praix yuh daux ju phan tix, mai teem kawn praix kadaux pa jauh ju phan pa khraox awm pa lo Maix Cao heue.

Rawg Siyiex grheu siawp sibrawm ceu pa caoxcaig khawm-uik lih hu khaing ju phan cie kawn praix liak, koe ngie Maix Cao nong tix pa mawh Siyiex pa uik die Ihaong daux ju kawnpraix tix, yuh bwanson tieh loh ka ju cie kawn praix kieh mhawm liak! mai tawx rieang rao ka kawn praix son sang ot koe im ju hawt ngaix sawm awm pa koe Alo Maix Cao heue. Amen**

Lheu khaing pa kah kum chawk cheng ka Siyiex tau mai krax rawg bwan

khai an maix caw koe akhuang bawg yam tix phat grawng lao cie Siyiex pa koe daux Lai Sigang Khri, mai khaw tix koe Akhuang bawgyam hu rom mai cub Khrityan hawt Ihang nyiex ma mai kadaux nyiex bwan (CeuCao) heue.

**Lox pa ah "Amen" mawh gumlox prim koe dee bleeh "Kieh mawh awm an" heue

Tau mai Yesux Khrit

ex pon rieb krax taoh luan khaing ceu inkix

Yohan 3:16,

1 Yohan 3:8

Yohan 1:12-13

1
Phimap

Romax 3:23-25

Makux 2:10

2
Phicaox

3
Yum

Yohan 14:16,18,26-27

16:33; Romax 8:26

4
Krax kha

5
Ang koe dee
bleeh

Efesux 1:4,11; 2:10;

1 Kawrinthux 15:57-58;

Romax 8:28;

Yohan 14:18-20; 15:15-16

Tau mai Yesux Khrit ex pon rieb krax taoh luan khaing ceu inkix

- 1) **Pa taoh luan khaing phimap** pon rieb krax pluat ploi mawh pui rauh see tau mai krax yumrhawm. (Romax 3:23-25; Makux 2:10)
- 2) **Pa taoh luan khaing siawp sibrawm krax vhaik** pa mawh pa luan khaing siawp sibrawm phicaox satan, pon rieb siawp sibrawm tix mawh kawn Siyex. (1Yohan 3:8; Yohan 1:12-13)
- 3) **Pa taoh luan khaing krax yum**, koe pa pex kapiang krax yum, rieb ju phan pa grum naog pa mawh ju phan leeing ju pa ang chix laux leeing. (Yohan 3:16; 10:10)
- 4) **Pa taoh luan khaing krax kha**, daux haktiex in koe krax kha tom nieviang mawh nan Yesux Khrit teem ex koe pa nhim sinax krax kha tau mai pa tawx Khwan Singax Singeh Nawh Cao hoek ot daux ju phan ex thung ex hu ka pa pex. (Yohan 14:16-18; 26-27; 16:33; Romax 8:18, 26; Philipix 4:6-7)
- 5) **Pa taoh luan khaing ju phan pa ang koe dee bleeh**, hu ka pa koe dee bleeh pa mawh ju phan pa hawt awm krax pa lo Siyex kah. Pa kieh ju phan koe krax keut pot jun pot, Iwat luan khaing ju phan pa uh ngai, voi nong tix tieh tix lih mawh ju phan pa koe Siyex ang jud jai tawx krax keud jhawm sawn ku bawg yam, koe krax bak viang pa sidawng laing laing kadaux ju phan krax ot koe ku ngaix ku sawm heue. (Efesux 1:4, 11; 2:10; 1 Kawrinthux 15:57-58; Romax 8:28; Yohan 14:18-20; 15:15-16)

[Share](#)



တ္ထံ - Shan



ไทย - Thai



Wa